

摘藻堂四庫全書薈要

集部

欽定四庫全書薈要

聖祖仁皇帝御製文第三集卷七目錄

勅諭

諭戶部

諭戶部

諭工部

諭內閣

諭大學士九卿等

諭刑部

諭內閣

諭吏部

諭吏戶兵工四部

諭工部

諭刑部

諭扈從大學士馬齊張玉書陳廷敬

諭山東巡撫趙世顯

諭河道總督張鵬翮

諭河道總督張鵬翮及河工官員

欽定四庫全書

卷七目錄

欽定四庫全書會要卷一萬三千九十一集部

聖祖仁皇帝御製文第三集卷七

勅諭

諭戶部

今歲直隸地方雨暘應候禾稼有秋各郡民生皆獲安
恒業惟是去歲山東被災之民自冬月以迄春夏流離
轉徙入順天河間境內者甚多於時設廠煮糜所在賑
救因而米價至今未減誠恐近畿一路閭井小民絀於

生計是宜加恩寬卹用弘休養順天河間二府屬康熙
四十四年應徵地丁銀米著通行蠲免該巡撫卽飭府
州縣官張示遍諭務俾窮鄉僻壤均霑實惠以副朝廷
優軫畿輔黎氓至意爾部卽遵諭行特諭康熙四十三
年十月初七日

諭戶部

朕宵旰孳孳惟以康濟民生為念每歲四方水旱皆諭
令各督撫不時奏聞仍間遣人員馳往各路諮詢農事

有自外省來者必詳問所過地方雨暘耕作之狀凡以
民生所重無如粒食不得不預為經畫也四十一年冬
朕巡幸至山東德州聞知萊蕪等六州縣民被災傷卽
與蠲免四十二年錢糧及四十二年春南巡視河經行
泰安一路見其閭閻生聚遠不逮於從前隨下諭詳察
被災州縣蠲除額賦並動倉穀賑濟但賑蠲雖行而人
民甚屬窘迫非以贍養蒙古之法行之不能立遂生計
再三籌策乃命官民願効力者百餘人星速前赴山東

計口授糧給衣濟用兼量助牛種等物貧窶之人皆賴以全活比朕避暑口外覺夏月雨水頗多卽命行文移問山東等省而東省果告潦災秋禾少收民滋困苦而地方人情猶帖然安堵此卽遣官養民之實效也因又下諭增益多員並准運通倉米石以資急用顧各州縣地廣人衆需費浩繁尤必大加賑施方能遍及特命漕臣親赴東省截留漕糧五十萬石分貯沿河鎮市衝要之地散賑而外卽平價發糶而又諭滿洲蒙古漢軍每

三佐領合派一人計得四百餘人此所派人員每佐領領帑金一千兩給之並備車輛駝馬等物令分往山東各州縣照前遣人員贍養以至來年七月為期其登青萊三府則截漕米由天津海道運至其地每府各三萬石又遣用大臣三員分三路往來巡視稽覈散賑事宜酌定平糶價值而民間始盡需實惠至於未經散賑之際饑民有流入京城者老幼仳離急於得食爰於今歲春月命八旗王貝勒大臣內務府官員並漢大臣官員設廠數十處煮賑一月有餘復念饑民拋棄鄉土久住京師究非長策於是遣官僱募船隻送還原籍仍給以銀兩為日用籽粒之資而流移之人遂得復安本業入夏以來風雨和調二麥稔登秋田多稼該省進呈穀穗合之往來人等奏對之言朕心始為大慰夫水旱災傷事所時有非恃廟堂之上多方賑救則民將何依朕為山左勞心籌畫者兩載於茲迺幸奏有成效今三路大臣及該撫俱奏年穀順成民生得所賑事告竣前後劾

力諸臣宜加獎勸去歲春秋二次遣往養民各員著察明議敘內有自出已力贍養者從優議奏其在京捐銀及資送回籍人員亦著一並議敘爾部即遵諭行特諭
康熙四十三年十月十四日

諭工部

洪澤湖之釘排椿原並非有關於湖水但於往來船隻甚有裨益是以去年悉令斜釘排椿聞今年湖中失風船隻甚少此不但今年當修每歲俱當修之其椿木在江南採買價值亦賤著兩江總督安徽江蘇巡撫江西巡撫及織造每年捐助椿木交張鵬翮修理康熙四十三年十月二十二日

諭內閣

湖廣省捐工建樓殊屬糜費凡車駕巡幸之處一切需用從不取辦於民而各省地方不肖官員指稱修理行宮供備器物並建造御書碑亭等項名色輒動用正項錢糧借辭捐還究無償補及至虧空數多復加倍私派

科斂肥已以致重貽小民之累種種弊端不可勝指嗣後著嚴行禁止下所司知之康熙四十三年十一月二十三日

諭大學士九卿等

朕四十餘年孜孜求治凡一事不妥即歸罪於己未嘗一時不自責也清夜自問移風易俗未能也躬行實踐未能也知人安民未能也家給人足未能也柔遠能邇未能也治至於上理未能也言行相顧未能也自覺愧

汗何暇論明史之是非乎况有明以來二百餘年流風善政豈能枚舉其中史官舞文杜撰顛倒是非者概難憑信元人修宋史明人修元史至今人心不服議論多岐者豈非前鑑耶朕無實學每讀朱子之書見相古先民學以為已今也不然為人而已之句罔不心悅誠服又讀孟子盡信書則不如無書益見史官上古不免訛傳况今人乎班馬異同左國浮華古人以為定論孔子至聖作春秋有知我罪我之歎後世萬倍莫及者輕浮

淺漏妄自筆削以為自足不過好其史筆之名也朕論時人之際凡天下讀書者皆能分辨古人之是非問以時事人品不能一字相答非曰從來不與人往來卽曰不能深知目前之事作官之道茫然不知而百千年前無一洞悉何得昧於當世而明於論古豈非遠者明而近者闇乎所以責人重者責已輕君子不取也明史不可不成公論不可不採是非不可不明人心不可不服關係甚鉅條目甚繁朕日理萬幾精神有限不能逐一

細覽卽敢輕定是非後有公論者必歸罪於朕躬朕不
畏當時而畏後人不重文章而重良心者此也卿等皆
老學夙望名重一時明史之是非自有燭見卿等衆意
為是卽是也刊而行之偶有斟酌公同再議朕無一字
可定亦無識見所以苦辭以示不能也康熙四十三年
十二月

諭刑部

監犯患病應卽撥醫調治今歲在監病故者甚多此皆

因堂司各官疎忽所致嗣後若復似此致斃多人將所
司官員定行治罪康熙四十三年十二月二十日

諭內閣

朝鮮國王因商人王富等一百餘人船隻遭風漂至伊
國卽給與口糧食物差官護送來京又將商人王秋等
四十人船隻修補給與口糧食物待風發回深可嘉尚
著下諭旨褒美之康熙四十三年十二月二十日

諭吏部

張鵬翮自簡任總河以來一應修築事宜悉遵朕指示
河工告成著議加宮保具奏康熙四十三年十二月二
十日

諭吏戶兵工四部

朕屢念民生加意河道屢行親閱一切疏濬修築事宜
悉經周詳指畫獲告成功前黃河之水往往倒灌清口
者皆由仲莊閘與清口相對駱馬湖水勢湍急遂逼黃
流灌入清口朕視河時躬臨相度命河臣移仲莊閘改

建於楊家莊出口工竣之後河臣報稱黃水暢流入海
絕無倒灌清口之患朕尚未經親閱今欲特蒞其地察
驗形勢用籌善後之規其中河黃河運河有應加修防
者亦隨宜指示以圖經久至於山東省荐饑之民賴兩
年來極力賑贍繼以有秋幸皆得所其民間生聚果否
殷阜並於沿途親行周覽焉乘茲仲春解凍減從輕裝
循河南下往返皆用舟楫不御室廬經過地方不得更
指稱繕治行宮妄事科斂其日用所需俱自內廷供御

從無纖毫取辦於民前此屢次南巡閭閻皆所深悉儻有不肖官吏藉名預備擅動官帑並圖日後加派補償以為巧取侵漁之地者事覺嚴行治罪決不寬宥所在官吏私覬扈從人員及隨行人役生事擾民者俱如前旨以軍法從事奸民挾私控訐者從重坐罪爾等部卽通行傳飭仍令該督撫張示徧諭俾小民咸知朕意特諭康熙四十四年正月二十三日

諭工部

總河張鵬翮請重修徐州城外堤岸徐州逼近黃河城外石堤工程甚屬緊要著即行修理康熙四十四年二月初三日

諭刑部

絞犯阿爾楚罪本應死念其祖母年逾九十母年逾八十兩世孀居情屬可憫著免阿爾楚死准留侍養康熙四十四年二月初八日

諭扈從大學士馬齊張玉書陳廷敬

總河昨日來問以河工形勢河事已大治矣從前駱馬湖口設竹絡壩湖水大則從壩流入黃河河水大則溢流入壩內今竹絡壩止有湖水暢流黃水並無浸灌則黃河之深通可知初次到江南時船在黃河兩岸人煙樹木皆一一在望三十八年則僅見河岸四十二年則河去岸甚低是河身日刷深矣自此日深一日豈不大治聞下河連年皆大熟亦從前所未有也康熙四十四年二月二十六日

諭山東巡撫趙世顯

朕為兩河告成特來巡視道經山左見民生自去歲休
養之後漸有起色朕心甚慰夾岸黃童白叟懽呼載道
感恩叩謝者日有數十萬今仲春之時麥苗未長所以
無妨儻回鑿之際正值農忙麥秀恐傷稼穡爾即曉諭
百姓槩免叩謝各務本業可也故手書特諭康熙四十
四年三月初五日

諭河道總督張鵬翮

河工已經告成善後方略更為緊要朕今親臨閱視修
建天妃閘甚當儻黃水長至五六尺清水不長勢弱不
敵黃黃水自然倒灌亦必致之理豈可因此卽謂治河
失策乎若遇倒灌卽將天妃閘暫下板蓄清水全力敵
黃不過數日黃水卽退遇糧船過時卽起板開放若黃
水不灌不必下板其惠濟祠一帶雖建有石工但運河
與黃河只隔一線之堤若黃溜衝刷石工恐不足恃著
於上下適中之處相度形勢修建挑水壩三四處挑溜

開行其王公堤亦應相度形勢修建挑水壩運河東堤
保守最為緊要堤岸應行加幫高郵迤南湖河水勢相
平界首迤南河水高於湖水東西兩堤卑薄應加幫修
理著量建石工淮安近城堤岸卑薄之處亦應相度形
勢修建石工黃河南岸堤工關係緊要應加謹修防至
於直隸山東河道與總河相距甚遠應照河南例各交
與該省巡撫就近易於料理其楊村通判並無經管之
事應行裁去爾同行在九卿速議以聞康熙四十四年

三月十一日

諭河道總督張鵬翮及河工官員

今河工雖已告成不可不預為修理防護以圖善後之策朕見淮揚一帶堤岸卑薄未為甚妥儻不加保護以致衝決則淮揚地方百姓何以能安爾等宜急籌之康熙四十四年三月十八日

聖祖仁皇帝御製文第三集卷七

欽定四庫全書薈要

聖祖仁皇帝御製文第三集卷八目錄

勅諭

諭江南總督阿山巡撫宋榮

諭江南督撫

諭內閣禮部

諭扈從大學士張玉書陳廷敬翰林查昇陳壯履錢名世蔣廷錫汪灝勵廷儀等

諭扈從大學士馬齊張玉書陳廷敬

諭扈從內閣吏部

諭浙江福建總督金世榮浙江巡撫張泰交福

建巡撫李斯義

諭江南總督阿山江寧巡撫宋犛安徽巡撫劉

光美

諭扈從大學士馬齊張玉書陳廷敬等

諭吏部

諭河道總督張鵬翮

諭扈從諸大臣及河臣等

諭河道總督張鵬翮

諭河道總督張鵬翮

諭河道總督張鵬翮

諭山東巡撫趙世顯

諭河道總督張鵬翮

諭河道總督張鵬翮

諭河道總督張鵬翮

諭內閣

諭戶部

諭大學士馬齊席哈納張玉書陳廷敬等

諭戶部

諭戶部

欽定四庫全書蒼薈要卷一萬三千九十二集部

聖祖仁皇帝御製文第三集卷八

勅諭

諭江南總督阿山巡撫宋榮

朕為兩河告成揚家莊新河建閘故來巡視因爾等同
地方士民所請過江而南見百姓雖不能家給豐裕且
幸安居樂業而無菜色朕心少慰矣編氓皆吾赤子數
十年休息培養民雖至愚皆已深知所以扶老攜幼日

計數萬隨舟擁道歡聲洋溢者降衷之誠也但人多路隘菜花麥秀徧地青苗不能保其無損朕甚惜焉爾等卽出示曉諭萬勿蹋壞田苗有負廛念特諭康熙四十四年三月二十六日

諭江南督撫

百姓隨船擁道日計數萬恐人多路隘菜蔬麥苗彌漫田野不能無踐損之虞朕甚惜焉可出示曉諭令勿蹋傷康熙四十四年三月二十八日

諭內閣禮部

原任侍郎勵杜訥供奉南書房三十餘年謹慎勤勞無有過愆以品級不應與謚但從前沈荃曾經與謚勵杜訥亦應與謚以示優卹著會同議奏康熙四十四年三月二十八日

諭扈從大學士張玉書陳廷敬翰林查昇陳壯履錢名世蔣廷錫汪灝勵廷儀等

朕萬幾餘暇臨摹古人書法於明董其昌真蹟尤加欣

賞茲來松江特書芝英雲氣四大字扁額並於前後書
評贊十數行可命提督張雲翼將扁製就往懸於其家
又其昌曾孫候選州同董建中家貧可憫著吏部遇就
近省分州同員缺卽與補授康熙四十四年三月二十
九日

諭扈從大學士馬齊張玉書陳廷敬

頃山東巡撫趙世顯奏三月初三日全省俱得雨二十
州縣雨微小七十州縣俱霑足朕時時以農事為念曾

問京師來人云三月十六二十四日兩日俱大雨想畿輔地方已皆霑足矣康熙四十四年四月初四日

諭扈從內閣吏部

翰林侍讀徐倬年踰八十學問淵博可特授侍郎銜以示獎進儒臣之意爾等會同議奏康熙四十四年四月初六日

諭浙江福建總督金世榮浙江巡撫張泰交福建巡撫李斯義

朕頃因親閱河工濟江而南至於浙省見民間生聚殷繁菜畦麥隴遠近彌望農事可冀豐穰朕心用以稍慰凡車駕臨幸之地必大敷膏澤以下逮黎元而各省錢糧屢次遞蠲浙江本年地丁銀米又經全免無可加恩惟是刑獄為民命攸關朕每當重罪奏讞之時常深切矜恤今乘輿所至父老子弟夾道歡迎而身陷囹圄之人獨自新無路朕甚憫焉浙江福建兩省康熙四十四年四月初八日以前凡犯罪詔款不應赦者不赦外其

餘死罪以下已發覺未發覺俱著減等發落四十三年
秋審奉旨監候緩決者一併減等發落仍開具人數奏
聞爾等其體朕為民巡省布德好生之意卽詳慎察明
遵行特諭康熙四十四年四月初七日

諭江南總督阿山江寧巡撫宋犖安徽巡撫劉光

美

朕念切民生凡巡幸所經之處諮詢利弊訪問官方未
嘗少懈向因江浙人情好尚詞訟因而傾家敗業者往

往有之邇來習俗頗覺淳厚詞訟已減大半生聚稍加繁殷雨暘有時麥田茂美朕心甚慰念江寧安徽錢糧已經節次蠲免今車駕親臨特頒沛澤將江寧安徽所屬地方人犯亦應照浙閩加恩概從末減可將康熙四十四年四月二十六日以前凡罪犯詔款不應赦者不赦外其餘死罪以下已發覺未發覺俱著減等發落四十三年秋審奉旨監候緩決者一併減等發落仍開具人數奏聞使普天赤子咸在化育之中縲紲愚民亦有

自新之路爾等其體朕矜恤黎元慎重民命之至意卽
詳恪察明遵行特諭康熙四十四年四月二十六日

諭扈從大學士馬齊張玉書陳廷敬等

宋明之時議馬政者皆無善策牧馬惟口外為最善今
口外馬廠孳生已及十萬牛則六萬羊則二十餘萬若
將此馬與牛羊驅入內地牧養卽日費萬金不足口外
水草肥美不費絲毫之餉而馬畜自然孳息因定額以
馬十萬牛六萬羊二十一萬為限向年疫氣盛行蒙古

馬畜多倒斃而官廠與彼同在一處毫無傷損前巡行
塞外時見牲畜彌滿山谷間歷行七八日猶絡繹不絕
也康熙四十四年閏四月初一日

諭吏部

土司苗人即准其考試用為牧民官亦復無幾部議不
准行何所見之淺耶如吳越初不奉中國之化迨後從
風服教俱同為中國之人以此例觀即可知矣著俱照
該撫所請行康熙四十四年閏四月初一日

諭河道總督張鵬翮

高家堰石工完者准先與銷算保固三年免其賠修堤
根下廢地可諭河兵試令種稻其餘除留取土搶修之
地外令捐栽蘆荻以資工料照例議敘康熙四十四年
閏四月初十日

諭扈從諸大臣及河臣等

朕留心河道親閱者屢矣河之形勢必身歷其地始知
成功之次第朕每至河上必到此惠濟祠以觀水勢三

十八年以前黃水汎濫凡爾等所立之地皆黃水也彼時自舟中望之水與岸平岸之四圍皆可遙見其後水漸歸漕岸高於水今則岸之去水又高有丈餘清水暢流逼黃竟抵北岸黃流僅成一線觀此形勢朕之河工大成矣朕心甚為快然向年自寧夏回曾走黃河察看彼處河勢亦甚險水面有與此相等者有更大於此者張玉書亦曾見之河在口外原走邊地因木難山是一整石山黃河至此觸石而回遂流入中國不然中國寧

有此河患耶康熙四十四年閏四月十一日

諭河道總督張鵬翮

惠濟祠前植標杆處可建挑水壩祠後埽灣處亦宜建挑水壩以保淤灘但此二處挑水壩俱不宜太長恐逼水盡向北岸有礙楊家莊口門卞家汪舊壩修建甚佳再略加寬長更善康熙四十四年閏四月十一日

諭河道總督張鵬翮

河工積弊汎官利於堤岸有事修建大工得以侵冒河

帑又希圖修橋建閘興無益工程於中取利著嚴飭各官痛改前非加謹修防儻有故違定行正法以示懲戒其地方有司官員膜視河工致有貽悞者爾題叅到日將地方官亦行正法河官平時須預備物料以為不時修防之需若料物不備遇工程險要倉皇無措雖將該管官重處亦屬無濟康熙四十四年閏四月十三日

諭河道總督張鵬翮

九里岡堤工修理得法不似從前直埽不能挑溜令修

魚鱗埽逐段挺出逼溜開行使窪處漸淤此法甚善其
埽工釘樁處可再建挑水壩二座若恐水深則先建磯
背壩形出水俟其壩下漸淤層次加修則料不加多而
功易成康熙四十四年閏四月十三日

諭山東巡撫趙世顯

朕因四方無事車駕南巡得訪民情深知利弊回舟山
左見麥秋大熟民無菜色朕心甚慰凡鑾輿所臨加恩
宥過企望刑期無刑也東省前歲儉收衣食惟艱所以

犯法者衆嘗念臨下之道惠化為先原情之仁含育在宥是宜悉除愆咎盡起枯沉可將山東所屬地方人犯亦照江南浙閩恩例槩從末減自康熙四十四年閏四月二十日以前凡罪犯詔款不應赦者不赦外其餘死罪以下已發覺未發覺俱著減等發落四十三年秋審奉旨監候緩決者一併減等發落仍開具人數奏聞但山東人性强悍輕生為盜者頗多爾等不時訓誨教養以副朕愛惜人命之至意頒示六府曉諭闔省特諭康

熙四十四年閏四月二十日

諭河道總督張鵬翮

山東運河轉漕入京師關係緊要不可忽略朕來時閱
視堤岸不堪今回鑿時計期兩三月而堤工修理甚屬
堅固嗣後當照此加謹修理不可因朕已經閱過致有
懈怠爾宜識之運河各閘照依漕規啓閉有勢要官員
經過不許徇情擅自開放洩水以致漕船稽遲違者朕
決不宥康熙四十四年閏四月二十一日

諭河道總督張鵬翮

高家堰每堡設立防險人員關係最為緊要現在防險各員俟秋汛後察明分別去留至簽釘救生樁木全活人命甚有裨益但釘過六處係險要之地其空處尚多全湖俱釘救生樁木約需銀五六千兩朕於內帑節用之銀發往修建務期救濟民生不動部撥錢糧爾即估計具摺遣人奏聞康熙四十四年閏四月二十一日

諭河道總督張鵬翮

戴村壩遏汶水出南旺分濟南北運道關係緊要總河
巡撫應各差官前往看視康熙四十四年閏四月二十
一日

諭內閣

開科取士以能明經義為重若增入詩賦則士子攻習
詞章反於經義疎淺甚非國家磨厲實學之意今闈試
屆期俞化鵬妄請更張成法大不合理該部覆議允行
亦屬不合可下旨通行嚴飭康熙四十四年五月初五

日

諭戶部

聞廣平縣地畝被淹百姓苦累輸納額賦甚屬艱難著
該撫察明停徵俟田地涸出之日開墾起科以紓民力
康熙四十四年五月初五日

諭大學士馬齊席哈納張玉書陳廷敬等

本內請免帶徵拖欠錢糧一事最當斟酌凡免來年錢
糧必於歲前傳諭者特使百姓預知蠲免不為有司所

欺耳今於免賦之年仍令帶徵舊欠則不無朦混徵收之弊此事行自何年爾等察明具奏康熙四十四年五月初八日

諭戶部

凡撥餉應就近撥給將直隸錢糧撥與江寧該部原撥時卽誤矣今又將直隸應解部錢糧發往俟秋收後方得起解則遲誤益甚著另議具奏兵餉關係緊急此後撥餉務於就近省分撥往勿致有悞康熙四十四年五

月十二日

諭戶部

嗣後蠲免新年錢糧如併免積欠則帶徵俱免如止蠲
本年錢糧無免舊欠之旨則所有舊欠錢糧俱於次年
徵收蠲免之年概不得開徵永著為例康熙四十四年
五月十九日

聖祖仁皇帝御製文第三集卷八

總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書薈要

集部

聖祖仁皇帝御製文三集卷

九至
十一

詳校官原任編修臣徐立綱

欽定四庫全書薈要

聖祖仁皇帝御製文第三集卷九目錄

勅諭

諭內閣

諭戶部

諭扈從大學士等

諭工部

諭內閣



諭工部

諭扈從大學士馬齊等

諭戶部

諭戶部

諭工部

諭內閣

諭內閣

諭大學士馬齊席哈納張玉書陳廷敬等

諭大學士等

諭戶部

諭兵部

諭貴州巡撫陳詵

諭大學士馬齊席哈納張玉書陳廷敬

諭九卿詹事科道

諭大學士馬齊席哈納張玉書陳廷敬

諭兵部

欽定四庫全書薈要卷一萬三千九十三 集部

聖祖仁皇帝御製文第三集卷九

勅諭

諭內閣

官員薦舉卓異關係激勸大典所列事蹟期有實濟於
地方百姓開載虛文無益嗣後薦舉卓異務期無加派
無濫刑無盜案無錢糧拖欠無虧空倉庫銀米境內民
生得所地方日有起色方可膺卓異之選其他所開虛

文俱不必入可會同九卿詹事科道定議具奏康熙四十四年五月十九日

諭戶部

江南不用小錢惟江北行使皆由山東多私鑄之故糧船及龍衣船載來北地者甚多朕已諭織造嚴加察緝今急收小錢與衆未便惟有嚴禁私鑄少寬禁小錢之限期方善耳康熙四十四年五月二十日

諭扈從大學士等

海賊案件今斷不可輕宥從前曾屢經寬釋如再宥則人不知警寇賊滋長臺灣為之不寧矣時勢不同當因時調度恐京中諸臣不知所以不免之故爾等將此意諭知在京大學士及刑部大臣康熙四十四年六月十九日

諭工部

四十二年朕閱河堤時張鵬翮等奏石堤於八九月間完工及今春閱視尚有未完之處曾在高堰堤上於衆

人之前面諭此堤經朕閱後今已三載而工尚未完萬一水勢大至欲恃此草埽捍禦難矣於時張鵬翮曾奏可以捍禦斷無妨礙今疏內雖稱漫溢堤岸或係已完石堤或係石工未及修完之處該部一併速議奏聞康熙四十四年七月初四日

諭內閣

人命案件關係重大有先審情真而後審屬虛者前任督撫審結之案後任督撫將不符之處輒稱無庸更改

可乎今佟毓秀欲將秋審人犯停其解赴省城則永無平反之事矣所奏無益不可行下所司知之康熙四十四年七月二十八日

諭工部

這修堤需用銀五萬餘兩著照所請速行動支修築朕今春閱河視高家堰所修石堤有修完保守已過三年者有仍未修完者若將修完保守已過三年之人與未修完之人一例坐罪則屬屈抑何人修完何人未修完

著總河張鵬翮作速察明奏聞康熙四十四年八月初二日

諭扈從大學士馬齊等

四十二年春朕往巡南省見山東歲歉民饑之狀卽截漕停徵蠲免錢糧遣情愿効力官員前往賑濟迨至秋間又撥八旗官員令每佐領領銀一千兩分往頒賑民乃得蘇是以効力人員皆令議敘今各佐領借支未還銀一千兩如仍向佐領按數扣除則兵丁糧餉必致不

數著將官庫利銀抵還此銀之數免於佐領扣除康熙
四十四年八月初三日

諭戶部

每佐領下未還所領官銀一千兩若令一百個月完結
為日甚久兵丁錢糧艱窘此項銀兩著將官庫息銀補
還免於各佐領下扣除用寬八旗甲兵之力康熙四十
四年八月初五日

諭戶部

鳳陽府屬州縣及睢寧沐陽二縣被災應蠲數目俱依
議速行災傷地方應徵地丁漕項銀米著暫停徵俟明
年秋收後該撫以所收豐歉具題請旨康熙四十四年
九月二十五日

諭工部

方今海宇昇平惟以安阜黎元為急東南要務莫重於
河防朕數經南巡指示修築方略凡以籌運道濟民生
也自曩歲兩河先後衝決而黃流淤墊繼以高堰唐埂

壩久決未塞而洪澤湖水直從決口旁洩以致淮水力弱黃水倒灌全河幾至潰壞於是分遣廷臣發帑金數百萬增築高堰盡閉六壩俾淮水全注清口又特築挑水壩以逼黃溜趨向北岸仍開濬陶莊引河以導黃北流然後黃水無倒灌之患四十二年以河工漸可底績躬親臨視時高堰石工尚多未竣飭令迅速修築又因仲莊閘水勢湍急恐逼黃流倒浸清口遂命閉仲莊閘改建楊家莊閘閘工既成今年春復往巡閱比至高堰

見石工仍未完固舊埽亦多朽塌諄諭河臣張鵬翮謂
水勢無常修防宜豫一有疎忽則前工盡隳且甫奏安
瀾旋報衝決天下其謂之何張鵬翮猶奏稱堤工捍禦
可以無虞迨伏汛大水驟發果衝決古溝唐埂清水溝
等處淮揚一路田畝被淹者甚衆今已嚴飭堵塞決口
刻期竣工朕屢親蒞河干詳度形勢當水漲之時若高
堰及運河減水壩不令開放則堤堰甚為危險若開壩
宣洩則閤閤隴畝必致淹傷方春水涸民間盡皆播種

一經夏水驟漲開壩放流而所播之種悉被淹沒朕心
惻然殊為不忍使不設法導流俾水有所收束則瀕湖
及下河民田究不免於水患朕再三籌畫宜於高堰三
壩之下挑濬一河兩旁築堤束水入高郵邵伯諸湖湖
外亦量築土堤不使漫溢其高郵減水壩下亦挑濬一
河兩旁築堤束水由串場河入白駒丁溪草堰等河白
駒等河淤淺之處並開濬深通俾之入海如此則各壩
所出之水不致有渙散衝流之害又洪澤湖水勢大漲

泗州盱眙等州縣俱被水災應於泗州一帶受水之地亦酌量築堤收束毋令汎濫則所全於淮安揚州鳳陽三郡民生者多矣此事原於河道無涉在河官止知保護河道不復詳計民生朕惟民間田畝所繫甚重宜圖萬全可久之策築堤束水行之北河業有成效則施之南河當亦有濟應從何地築堤延袤若干里需費幾何行令江南總督總漕總河江蘇巡撫會同確勘詳議具奏爾部卽遵諭行特諭康熙四十四年十月初四日

諭內閣

今直省人命案件較前亦極少矣康熙四五年至三十九年人命事甚多朕數年來留心詳察稍可矜者必為之求生路極可惡者始正法以為衆戒又不時嚴飭該管官員是以自四十年以後命案漸減觀歷年秋審冊便可知矣滿洲自定新例以後命案亦絕少大抵人命事不可不詳其情理代彼求生路亦不可不使國法平允但處分得宜事自少也康熙四十四年十月初七日

諭內閣

各省秋審尚無可議朝審則太寬書云罪疑惟輕以其罪有可疑之處而輕之也若無可疑則以公平為貴現在殺人之人情罪顯然又何所疑而欲從寬乎執法之人但當詳情據理以定罪一味從寬則惡人何所警戒可以此諭刑部康熙四十四年十月十五日

諭大學士馬齊席哈納張玉書陳廷敬等

各省提督內如李芳述趙宏燦潘育龍岳昇龍俞益謨

皆有名而李芳述尤年久當吳三桂時即在行間諳習
兵事項征紅苗之際令極嚴明其標兵一人陣亡則同
立一處之兵必負其屍出送於提督之前隨即還立原
伍略無差誤凡出征之前鋒軍無不歎異之張雲翼在
松江雖松江鄉紳稍有怨言而此番南巡見其練兵甚
善民皆稱之亦良將也康熙四十四年十一月初三日
諭大學士等

俄羅斯來使所齎之文乃喇塔諾托多烏祖克俄羅斯

三種文也外國之文亦有三十六字母者亦有三十
五十字母者朕交喇嘛詳考視之其來源與中國同但
不分平聲上聲去聲而尚有入聲其兩字合音甚明中
國平上去入四韻極精兩字合音不甚緊要是以學者
少漸至棄之問翰林官四聲無不知者問兩字合音則
不能知中國所有之字外國皆有之特不全耳康熙四
十四年十一月十二日

諭戶部

朕宵旰勤民屢思愛養惟務簡徵寬賦以期實惠黎元
間有州縣水旱不登即詔所司亟議蠲賑其直隸各省
每歲應輸額賦有以次遞蠲者有頻蠲數年者有將帶
徵積欠暫令停徵者凡以蠲除額賦專為小民樂業遂
生一歲以內足不踐長吏之庭耳不聞追呼之擾庶幾
休養日久馴致家給戶足而民咸得所也曩年楚省錢
糧雖屢行豁免今已歷數載未經特蠲應將該省額賦
全免一年以示朕加恩優渥之至意湖北湖南康熙四

十五年除漕糧漕項外其餘地丁銀米一概免徵舊欠未完者並停輸納爾部移文該督撫令各飭屬員張示徧諭窮鄉僻壤咸使周知儻不肖官吏於額徵之外巧立名色別有科派私圖肥己者察出定治重罪爾部卽遵諭行特諭康熙四十四年十一月十七日

諭兵部

每幫漕船止恃千總一員管領漕糧所繫甚重近見領運千總庸劣者多著漕運總督將庸劣不堪之員察出

盡行懲革該部另選擇補授俾不致貽悞重運康熙四十四年十二月十一日

諭貴州巡撫陳詵

貴州地方小易治雖有苗人亦無他事但以文武和睦安靜不生事為要清官多刻刻是清官不足處屬吏貪污固當叅劾其居官平常者則須教誨之邊地原苦為大吏者不可欲見才若尋出事做顯我才情便非正理爾切識之康熙四十四年十二月二十日

諭大學士馬齊席哈納張玉書陳廷敬

衛所改為州縣斷斷不可前于成龍為直隸巡撫即欲以衛所改為州縣朕不允所請後郭世隆又以此條奏九卿議從其言因而准行至今百姓猶以為苦近者如此况遠者乎御史陳勳所奏著不准行康熙四十五年三月初四日

諭九卿詹事科道

朕總理幾務甚久茲年歲日益夙夜乾惕與月俱增自

去冬無雪及今春深尚未得雨地氣熯燥不和又雲色多細縷狀朕知之既晰豈可不降諭旨此非僅無雨且恐別有變異與其有變而後講求不如君臣於未事之先將政事得失任為己責竭誠據忠詳加計議之為當也但數語頌揚虛辭省改未可即以塞責夫民為邦本食為民命朕自東作以至收穫屢念靡寧迨秋成以後或豐或歉之既定然後此心少釋別為計畫爾等俱係大臣或司言職事有缺失各宜直陳這所議未詳盡著

再行確議以聞康熙四十五年三月初六日

諭大學士馬齊席哈納張玉書陳廷敬

朕觀前史如漢朝有災異見即誅一宰相此大謬矣夫宰相者佐君理事之人儻有失誤君臣共之竟誣之宰相可乎或有為君者凡事俱付與宰相此乃其君之過不得獨咎宰相也康熙十八年地震魏象樞云有密本因獨留面奏言此非常之變惟重處索額圖明珠可以弭此災矣朕謂此皆朕身之過與伊等何預朕斷不以

已之過移之他人也魏象樞惶遽不能對當吳三桂叛時索額圖奏云始言遷徙吳三桂之人可斬也朕謂欲遷移者朕之意也與他人何涉索額圖甚懼而退至於巴圖魯公教拜過必隆為圈地事殺尚書蘇納海督撫朱昌祚王登聯冤抑殊甚此等事皆朕所不忍行者朱昌祚不但不當殺並不當治罪也康熙四十五年三月初八日

諭兵部

國家綏靖疆圉安輯軍民惟專閫元戎是賴有實能久
鎮邊境懋著成勞者則獎勸酬庸宜踰常格貴州提督
李芳述自歷行間二十餘載屢立戰功及黔省蒞事以
來御軍有法訓下知方威望蔚聞謀猷益殫矧年稱耆
宿見今舊將閱歲之久罕與媿倫用沛殊恩特彰優異
著加太子少保授為鎮遠將軍以示朕褒寵勞臣至意
爾部即遵諭行特諭康熙四十五年四月初四日

聖祖仁皇帝御製文第三集卷九

欽定四庫全書薈要

聖祖仁皇帝御製文第三集卷十目錄

勅諭

諭兵部

諭雲南巡撫郭棟

諭大學士馬齊席哈納張玉書陳廷敬等

諭內閣

諭刑部

諭内閣

諭戸部

諭修國史諸臣

諭戸工二部

諭内閣

諭内閣

諭刑部

諭刑部

諭戶部

諭刑部

諭刑部

諭內閣

諭武殿試讀卷官等

諭武殿試讀卷官等

諭吏部尚書溫達

諭內閣

全
方
口
八
八
一

卷
十
日
錄

諭內閣

欽定四庫全書薈要卷一萬三千九十四集部

聖祖仁皇帝御製文第三集卷十

勅諭

諭兵部

陝西邊方武職全賴俸祿資給所需棉甲若令捐造恐
致生扣剋兵餉之弊著陝西總督巡撫甘肅巡撫照數
作速捐造交該提督散給完日具奏康熙四十五年四
月十七日

諭雲南巡撫郭瑛

雲南係邊地因爾賢能故特加簡用爾往當小心辦事
雲南米穀豐足地方太平爾但一意撫恤兵民不可越
外生事為巡撫者必如齊世武之操守清正乃善既為
督撫豈憂衣食缺乏前任督撫一味欺蔽故身名俱敗
爾當體朕意實心奉行康熙四十五年四月二十四日
諭大學士馬齊席哈納張玉書陳廷敬等

總督石文晟前劾土司田舜年何不同後摺一併具奏

乃致兩番叅劾又摺內不言兩巡撫專請交提督審問
此必有故從前吳三桂自水西烏蒙土司地方進兵取
雲南因知其地產銀遂於康熙初年奏請進剿水西後
得其地分為四府我軍此番亦大有損傷今此事雖小
斷不可生事爾等將前後奏摺及土司呈詞一併抄出
發與湖南巡撫趙申喬湖廣提督俞益謨令不必會同
商議可各出已見作速具奏康熙四十五年四月二十

九日

諭內閣

去歲視南河時曾於衆人前言高堰堤工不堅尚宜增築張鵬翮以河工已完斷然無害朕謂爾雖言工完朕不能信及後堤工潰決幸是唐埂六堤上流若在下流如何堵禦康熙七年九年二十二年七里溝清水潭龍窩等處沖決之時其水甚大去年水不甚大然而沖決者河臣自以為河工已完玩忽之所致也康熙四十五年五月初一日

諭刑部

李應貴係大光棍其主伊洛爾圖責打至死雖例當治罪而其情事稍有不同著免其主罪使惡棍聞而知懼
康熙四十五年五月初一日

諭內閣

直隸巡撫趙宏燮前為河間數州縣積欠錢糧請分年帶徵朕已批發令其具題昨日欲下旨查直隸歷年拖欠錢糧總數偶爾遺忘可著戶部察明速奏有民困難

徵者即酌量豁免康熙四十五年五月初九日

諭戶部

朕宵旰圖維勤求民隱每欲敷蠲貸之恩以為閭閻留
有餘之力直隸山東地方四十二年偶遇災沴因特免
山東四十三四兩年額賦並四十一年以前積欠錢糧
直隸則順天河間兩府四十四年額賦亦俱豁免今雖
屢年收穫民氣漸舒而所有宿逋尚應輸納朕念黎元
方有起色辦賦猶艱一時新舊並徵勢難兼應宜更加

寬恤以弘休養直隸自康熙四十一年至四十三年各
府屬未完民欠銀八萬二千七百兩有奇糧五千九百
石有奇山東省康熙四十二年各府屬未完民欠銀一
百六十九萬一千七百兩有奇糧五千九百石有奇或
見在徵取或分年帶徵俱著通行蠲免俾小民悉除逋
負之累儻應徵舊欠有見完納在官者即准抵本年正
賦諭旨到日各該撫速行所屬有司徧示曉諭有不肖
官吏朦溷徵收不與開除明白者該撫即時叅劾嚴加

治罪爾部即遵諭行特諭康熙四十五年五月十七日
諭修國史諸臣

開國功臣作傳當因其事蹟先後以定次第若視功績
分次第或有本人功績少而子孫功績多者反置子孫
於前列可乎今應分別

太祖

太宗

世祖三朝功臣以何人居首請旨再定至逮事三朝功

臣各於本人傳內通行開載事蹟其子孫有立功者附載於下俟作傳畢可錄出分給其子孫各一通令藏於家康熙四十五年六月初一日

諭戶工二部

戶部工部凡咨取錢糧事俱不奏聞所以二三十萬銀兩不過以一咨文取之而事已畢嗣後著戶工二部將不啟奏用咨文動支大小款項錢糧於月終明白彙奏則凡事知所做畏而錢糧大可節省矣康熙四十五年

六月十九日

諭內閣

該撫前以建鐵索橋奏請朕初慮成功之難今工已報完於兵民實大有裨益爾等亦知鐵索橋之所繇來乎往時達賴喇嘛西路地方所建鐵索橋甚多此安樂地方亦照彼式建造然與雲南鐵索橋不同雲南地方傍有石崖釘鐵索建橋極其堅固此處以石為柱貫鐵索為橋尚恐久後未必能堅固也康熙四十五年六月二

十八日

諭內閣

朕自親政以來斷不許人懷挾私讐互相陷害是以三
四十年間無大臣互訐之事此一端朕心頗以為善凡
誣陷人及攻城屠戮人者縱使其身倖免於禍子孫斷
乎不昌近觀貪官受報亦復如是從前督撫如屈盡美
等皆以貪故其子孫極貧困不能自存或有學道考試
不公而所生之子凡書讀過即忘並有瘖啞者殊為可

畏聞武會試亦未盡公前次考試時朕有所素知之人亦與考朕恐人知之則必取中故不以告人凡人功名所繫但欲其公取耳朕尚以孤寒抱屈為念試官何不一計及於此乎康熙四十五年七月初二日

諭刑部

馬羣頭目及放馬人等若有凌虐居民莊頭及所行兇惡事發定行處死該管大臣官員一併嚴處決不寬貸屢有明旨令人命事發將該管大臣官員並置不議而

事內關涉之人所議俱輕著察明原旨再嚴加議處以
聞康熙四十五年七月初九日

諭刑部

部議毆打蘇儀鳳一案稱與太監張玉無干朕平昔恐
太監生事約束甚嚴這事既與太監無干張玉又何故
同去此皆因該管首領等不行嚴管以致張玉得乘間
而出張玉及該管首領等再一併嚴加議處具奏康熙
四十五年八月初二日

諭戶部

陝西捐納一事歷年甚久今復將三十一萬餘石未完
溢米欲行頂捐具題或前捐案內款項未清欲倚藉此
事完結或地方官員更欲借端希圖取利有此情弊亦
未可知若在北京頂捐事易完結且不煩擾九卿詹事
科道可再會同議奏康熙四十五年八月十一日

諭刑部

凡盜犯無自認口供方待夥盜質証陳子為一案既稱

歷審夥劫分贓與原招相符又稱夥盜已決無証應擬
斬候質是否與律例符合著察明確議以聞康熙四十
五年八月十一日

諭刑部

朱拉哈原非廣東本籍之人又無公務差遣以旗下人
擅離京城至廣東輒因私事打死百總情罪可惡擬以
緩決非是著改為情真大凡執法之人不可少偏若將
當正法之人寬宥則惡人何所懲戒乎康熙四十五年

十月初一日

諭內閣

敦拜向為司官朕洊次擢用至尚書並無効力勤勞之處凡事不留心詳察聲名亦不佳廷議係國家大事前曾有事會議敦拜全不諳事理恣意妄言彼時即當黜退今既以年老乞休著解吏部尚書任彼並非有勞舊臣不必予以優旨凡為人臣者雖當暮年宜更加意潔已勤勞王事如謂年老略不留心諸務黽勉自効豈任

彼為大臣徒使之榮顯已耶如此者罷之亦何足惜尚
書溫達自任工部以來聲名甚優凡事敬慎而寬著調
補吏部尚書工部事務亦緊要但六部侍郎名俱不甚
佳部臣之優劣外省督撫却知之甚真居官美惡豈能
欺人耶戶部錢糧事務弊端極多滿漢大臣名亦不佳
今刑部十日彙題一次猶覺弊竇差少耳康熙四十五
年十月初一日

諭武殿試讀卷官等

今天下太平日久曾經戰陣大臣已少知海上用兵之法者益稀日後臺灣不無可慮朕甲子年南巡由江寧登舟而下至黃天蕩江風大作衆皆懼欲下篷朕獨令滿篷衝風而行佇立船頭射江豚略不經意後又南巡乘船渡江即覺心動去歲之行見人渡江者即為心悸朕以一身而數更端皆年為之也大約年少則志氣強年老則志氣衰嘗問之先登老将皆云彼時年俱少壯故能登城今則怯矣將軍提督總兵官前當年少故冒

鋒鏑越險阻所在効力今官至大位家亦富饒且年高者多設一旦有事使之率兵而行欲其奮勇登先効命如前時何可多得耶康熙四十五年十月初六日

諭武殿試讀卷官等

凡人必耐得勞苦乃能有成不耐勞苦到處無用不但武臣為然即文臣若不勞苦如何學問成就今爾等二三老臣年雖高而勤勞實甚觀部院官止圖安逸凡事俱不經心兵部前以會試人未到齊請展限數日此彼

所親奏之事也。昨問續到幾人，堂官俱不知。因令問司官筆帖式，亦皆不知。朕之使問司官筆帖式者，此言甚重。不知伊等亦知之否。至於會議時，九卿內但一二人立議，餘皆隨班畫題，竟無一留心任事之人矣。康熙四十五年十月初六日。

諭吏部尚書溫達

朕因吏部事務緊要，故特簡任爾。凡銓選皆有定例，爾但當遵例而行。至於掣籤時，遞呈駁查，或作單月，或作

雙月俱多情弊如果有不平之處宜先期遞呈臨期方遞呈者安保無情弊乎爾宜留心康熙四十五年十月初九日

諭內閣

九卿議土司事但議使兩造平息總督石文晟原叅田舜年建造宮殿行兇作惡是以羈留於武昌府今田舜年已故石文晟又具奏欲息其事如土司等果抗拒不法則當發兵征剿土司等若無罪則當反坐原叅之人

朕意以二格所奏為是此事不便令督撫提督會同審
理當於京中特遣大臣前往察審著以此諭九卿康熙
四十五年十月十三日

諭內閣

兩廣鹽課每歲缺額甚多此皆各處浮費太繁之所致
也如將浮費款項交與巡鹽御史察核必不能清惟令
巡撫兼理鹽務一年則未完之項俱可清矣爾等可同
九卿等會議以聞康熙四十五年十月十三日

聖祖仁皇帝御製文第三集卷十

欽定四庫全書薈要

聖祖仁皇帝御製文第三集卷十一目錄

勅諭

諭內閣

諭刑部

諭戶部

諭大學士馬齊席哈納張玉書陳廷敬李光地

諭大學士馬齊席哈納張玉書陳廷敬李光地

諭大學士馬齊張玉書陳廷敬李光地等

諭大學士馬齊張玉書陳廷敬李光地等

諭大學士席哈納吏部侍郎張廷樞兵部侍郎

蕭永藻

諭戶部

諭禮部

諭大學士馬齊張玉書陳廷敬等

諭戶部

諭戶部

諭刑部

諭吏戶兵工四部

諭扈從視河諸臣及總河衆河官等

諭扈從大學士馬齊張玉書陳廷敬等

諭戶部

欽定四庫全書薈要卷一萬三千九十五

集部

聖祖仁皇帝御製文第三集卷十一

勅諭

諭內閣

總河報秋汛疏越二十日方到朕屢次臨幸洞悉河上情形如奏報水汛事早到則其中或有所指示猶可及時預防嗣後有奏河工急務者限兩三日飛馳遞送昔年報軍中機務一日馳七百餘里今從河上來二三日

內到亦非難事康熙四十五年十月十七日

諭刑部

陝西秋審案王生彩擬緩決甚當但勘語內止言生彩
拉傷李希泉之腎致斃擬以緩決而李希泉前次盜葱
割耳之處未經提出不合人命關係重大一字一句不
可不慎著改正具奏康熙四十五年十月十七日

諭戶部

錢糧支用太多理當節省否則必致經費不敷彼時又

欲議開捐納乎每年有正項蠲免有河工費用必能大加節省方有裨益前光祿寺一年用銀一百萬兩今止用十萬工部一年用二百萬兩今止用二三十萬必如此然後可謂之節省也康熙四十五年十月二十一日

諭大學士馬齊席哈納張玉書陳廷敬李光地

前遣護軍統領西柱等往擒假達賴喇嘛及第巴妻子時皇太子與諸皇子及諸大臣俱言一假達賴喇嘛擒之何為朕意以衆蒙古俱傾心皈嚮達賴喇嘛此雖係

假達賴而有達賴喇嘛之名衆蒙古皆服之僮不以朝命遣人往擒若為策旺喇卜灘迎去則西域蒙古皆向策旺喇卜灘矣故特遣西柱等前去西柱等方到其地策旺喇卜灘果令人來迎以此觀之若非遣人先往則假達賴喇嘛必已歸策旺喇卜灘若歸策旺喇卜灘則事有難言者矣至西域回子及蒙古今衰弱已極欲取之亦甚易但併其地不足以耕種得其人不足以驅使且現今伊等已俱降封為王侯恪守法度是以不取此

等情事馬齊俱知之爾漢大學士及九卿等想俱未深
悉爾等可將朕諭明示九卿康熙四十五年十月二十
一日

諭大學士馬齊席哈納張玉書陳廷敬李光地

朕不但悉知達賴喇嘛之事回子及邊外蒙古始末與
其祖父姓名俱知之昔日達賴喇嘛存日六十年來塞
外不生一事俱各安靜即此可知其素行之不凡矣後
達賴喇嘛身故第巴雖隱諱不言然觀其啟奏之辭非

昔日達賴喇嘛語氣朕是以知其已歿遣使細訪果如所料兩年內乃盡得其欺詐之狀自達賴喇嘛故後第巴遂教噶爾丹各處妄行生事矣康熙四十五年十月二十二日

諭大學士馬齊張玉書陳廷敬李光地等

觀朝鮮國王凡事極其敬慎其國人亦皆感戴聞其國有八道北道與瓦爾喀地方土門江為界東道接倭子國西道接我鳳皇城南道接海猶有數小島此等地方

太宗皇帝定朝鮮之後我兵無處不到以已破之國我朝為之重加營建俾安堵如故是以其國人於

太宗皇帝駐軍之地樹立石碑備書更生之德累世感戴以至於今且彼更有可取者明之末年彼始終未嘗叛之猶為重禮義之邦也康熙四十五年十月二十三日

諭大學士馬齊張玉書陳廷敬李光地等

翻譯之事大有關係向年纂修實錄校對朝鮮表文滿

漢文意總不相符前大學士圖海杜立德皆惶急呈朕親覽朕兩年苦心尋繹始得將文義完美作史之事殊為重大一字不可輕易增減所以朕於明史不敢自任者亦此故也近日大學士熊賜履以朱子書呈覽其中數語稍有可疑問之熊賜履以為非朱子之言殆朱子門人所記此不過託諸空言猶可矢口而談如係文案供招之事將何以解之信乎垂後之書不可忽也康熙四十五年十月二十三日

諭大學士席哈納吏部侍郎張廷樞兵部侍郎蕭

永藻

田舜年一事關係土司竝於地方督撫提督亦有關係若不究其本末辨其是非則衆心不服爾等到彼可與前都御史梅鋈學士二格同審凡事必共相商酌而行併取該督口供如總督理虧則罪坐總督如土司理虧則罪坐土司惟公平則人心自服爾等至彼處須出示曉諭衆土司若彼果有冤枉許其出訴爾等收呈詳審

窮詰根柢如無冤枉則欽差大臣至彼地提人不解反
固守關隘不納公差此特欲反耳竟發荊州大兵立剿
之不可持兩端苟且結案也總督叅田舜年事極其狠
毒今又欲草草完結何以服人心九卿竝不據大體立
議首鼠兩端愈非理矣爾等前去若不能辨明此事則
於爾等聲名亦大有所係也康熙四十五年十月二十
三日

諭戶部

朕子育黎元日求所以休養利濟之道念惟賜租減賦
實有裨益於民生直隸各省錢糧次第全蠲一年者業
經數舉獨是歷歲逋負積累加增舊稅新徵勢難兼辦
縱使少寬民力分年帶輸而督令續完仍多拮据朕睠
懷及此深切軫恤是用蠲逋已責大沛恩膏俾閭閻獲
免追呼官吏亦不罹叅罰直隸山東積欠錢糧今年俱
已蠲免其山西陝西甘肅江蘇安徽浙江江西湖北湖
南福建廣東各省自康熙四十三年以前未完地丁銀

二百一十二萬二千七百兩有奇糧十萬五千七百石
有奇著按數通行豁免或舊欠已完在官而見年錢糧
未完足者亦准扣抵諭旨到日各該撫立行所屬張示
徧喻有不肖有司以完作欠朦溷銷算及開除不清者
該督撫即時題叅嚴加治罪爾部即遵諭行特諭康熙
四十五年十月二十五日

諭禮部

朝鮮南桃浦漂損船隻所有黑角等物解送京師殊累

驛遞且屬無用蘇木亦不必變價可即令該國王酌量
處置所司移文傳諭之康熙四十五年十月二十五日
諭大學士馬齊張玉書陳廷敬等

山東長山縣周村一帶俱開鑪私鑄巡撫趙世顯不禁
不捕反請鼓鑄大錢若不禁私鑄而鑄大錢則大錢重
小錢輕小民必思射利燬大錢而鑄小錢是大不利於
地方矣今山東奸民鑄小錢者甚多或地方官圖利與
之同事亦未可知但未挈獲何可懸擬頃差侍郎恩丕

等帶德州兵丁馳驛往長山周村等處捕鑄私錢之人
挈獲之後竝私鑄之鑪帶往趙世顯處示之問地方現
鑄私錢不禁不捕又欲請鑄大錢何也趙世顯將何辭
以對外省督撫孰賢孰否朕俱知之清濁斷不能掩但
不壞事不擾地方足矣康熙四十五年十月二十七日

諭戶部

朕念八旗禁旅為國家根本所繫時厯加恩愛養用俾
生計充盈或動支公帑數百萬代清積逋或於各旗設

立官庫資濟匱絀所以為衆甲兵籌畫者甚切康熙四十二年又曾頒發帑金貸給八旗兵丁共六百五十五萬兩有奇至四十五年冬除陸續扣完外尚未完銀三百九十五萬六千六百兩有奇若仍行按月扣取恐各兵營辦器用贍養室家必有物力不支之慮朕每懷及此深切軫惻茲特大沛恩施式弘撫育將未經扣取銀兩通行豁免爾部即傳八旗都統等出示徧諭俾咸知朕優恤禁旅至意特諭康熙四十五年十一月十九日

諭戶部

今歲漢江水大南鄭等縣城垣田舍被水衝沒且米價騰貴小民艱食所有本年應徵錢糧著豁免明年以後地丁錢糧亦著暫行停徵俟應徵收之年該督撫察明具奏起科現在被災人民著該督撫速行賑濟康熙四十五年十一月二十日

諭刑部

歷年以來內外監候緩決人犯二百二十五名俱著免

死減等發落在直隸各省者爾部即移文各該巡撫令
遵旨速行康熙四十五年十二月二十一日

諭吏戶兵工四部

朕念黃淮兩河工程為東南要務屢次躬臨河上相度
指示一切修防疏濬業已次第奏功昨歲河漕督撫諸
臣詳勘地形請於溜淮套別開河道直達張福口以分
淮勢朕欲即令動帑興築而督撫諸臣又以事關創建
合詞請朕親閱九卿等集議復再三陳請朕以諸臣之

言奏聞

皇太后

皇太后懿旨謂河事重大允宜親臨指授朕祇遵

慈命擇於康熙四十六年正月二十二日起行閱河舟楫往返不御室廬日用百需取辦內府經過府州縣毋得更以預備行宮供張御用冒侵庫帑科斂閭閻儻有不遵事覺定嚴加治罪其文武大小官員私相餽問隨從人役生事擾民及奸惡挾私告訐者俱如屢次諭旨

重罪不宥爾等部即轉行各該督撫通飭所屬張示徧
諭俾咸知悉特諭康熙四十六年正月十三日

諭扈從視河諸臣及總河衆河官等

從前見所上河圖謂於運道民生必有裨益故屢次下
旨不必親閱即昨日到武家墩尚謂溜淮套河若開成
則徐光啟功亦不小乃今日所見與圖中所繪絕不相
同所立標竿有壞人田廬者有毀人墳墓者若總河及
河官墳墓被人掘發肯嘿然坐置不問耶張鵬翮讀書

講理學而為此事殊不可解先年靳輔開中河避黃河
一百八十里之險確有成效至今人追念之其所開之
河實因舊河疏濬今則鑿山開嶺不惟成功甚難即使
功成將來汎水泛溢不入洪澤湖必有衝決運河之事
矣明時淮黃與今迥別明之黃水勢強淮水勢弱故每
有倒灌之患朕甲子年閱河時兩河形勢記憶甚明後
經漸次修治今淮強能敵黃矣然疏導湖水尚宜講求
與其開溜淮套無益之河不若將洪澤湖出水之處再

加寬深使淮流益暢更為有益現今帑藏充裕若果有益於河事即發千萬金亦所不惜觀蔣家壩天然壩一帶舊有河形更加挑浚深通俾商民船隻俱可通行豈不勝溜淮套百倍耶康熙四十六年二月二十日

諭扈從大學士馬齊張玉書陳廷敬等

溜淮套事督撫等奏請開濬真可謂輕舉妄動此間百姓甚是謹厚老成朕初問時但云儻若當開自邀聖鑒若不當開自然不允小民惟有靜聽及聞停止開河一

路百姓無不欣喜踴躍可見小民自有公論在也爾等
可寫一諭旨曉諭衆人康熙四十六年二月二十一日

諭戶部

耗贈米石若不預行支給則旗丁必至困苦即所運漕
糧一無掛欠回省而不肖官員竟不按數給與旗丁侵
蝕入己亦未可定趙申喬將耗贈米石預給旗丁甚是
爾部照戴璠條陳具議不合此事著仍照舊例行康熙
四十六年三月初五日



聖祖仁皇帝御製文第二集卷十一

總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書薈要

集部

聖祖仁皇帝御製文三集卷十

四二至

詳校官原任編修臣徐立綱



欽定四庫全書薈要

聖祖仁皇帝御製文第三集卷十二目錄

勅諭

諭戶部

諭戶部

諭浙江福建總督梁鼎浙江巡撫王然江南江

西總督邵穆布安徽巡撫劉光美江蘇巡撫

于準山東巡撫趙世顯



諭刑部

諭扈從大學士馬齊張玉書陳廷敬等

諭吏部

諭戶部

諭兵部

諭內閣

諭內閣

諭內閣

諭工部

諭大學士馬齊等

諭起居注官揆敘等

諭大學士馬齊等

諭兵部

諭大學士馬齊等

諭戶部

欽定四庫全書薈要卷一萬三千九十六

集部

聖祖仁皇帝御製文第三集卷十二

勅諭

諭戶部

廣東兵餉不敷每年將就近省分錢糧按數撥解這巡鹽衙門所得羨餘及運司衙門羨餘銀兩部議俱著解京不合著將此項銀兩即存留彼地充餉以省撥解之煩康熙四十六年三月初五日

諭戶部

興安州城垣堤岸不必各官捐修所需錢糧無多俟該
撫估計到日將在京項捐西安米石銀兩爾部如數支
給可以剋期完工康熙四十六年三月十四日

諭浙江福建總督梁鼐浙江巡撫王然江南江西
總督邵穆布安徽巡撫劉光美江蘇巡撫于準
山東巡撫趙世顯

朕頃因視河駐蹕淮上江浙兩省官員及地方紳士軍

民咸環道遠迎懇請臨幸朕勉順羣情涉江而南循省
風俗所至郡縣見雨暘應時麥苗蕃殖比閭樂業可冀
盈寧雖山東一路尚未悉覩而江浙田疇鬱蔥在望深
愜朕懷方今二麥垂熟正將刈獲之時一切扈從人員
皆以次舟行不致蹂踏誠恐百姓緣途迎送老稚扶攜
動盈千萬越阡度陌未免踐傷朕心甚為軫惜雖民情
依戀出於悃誠但農事方殷應令所過地方悉停止岸
傍迎送且車駕來時小民業已瞻覲茲節候漸熱朕舟

行乘夜迎涼亦未可定民雖遠來無由親見爾等督撫
可張示徧加曉諭使各知悉俾無負朕重農愛民之意
特諭康熙四十六年四月十一日

諭刑部

張四因其兄方在臥病其嫂牛氏毆打其兄張四勸阻
不止情急毆牛氏致死情有可原著照例減等發落康
熙四十六年四月十八日

諭扈從大學士馬齊張玉書陳廷敬等

浙江巡撫王然諸事極其小心朕昨面諭之云巡撫係地方大臣凡遇應行之事須有擔當可行則行不宜過於畏慎總督梁鼎則所行不差可以任用提督吳英真是老將前召見時問以地方事宜所對有原有委與一切粗率者不同當馬得功海上用兵時吳英即在其內歷今五十餘年所經戰陣甚多目前諸將中能明白水性料理水師者罕能及之其人亦頗通文義如此老將當授以將軍之銜如孫思克李芳述例可作諭旨下兵

部授之康熙四十六年四月十九日

諭吏部

朕厯念河防屢行親閱凡自昔河道之源流及歷來治河之得失按圖考蹟靡不周知粵從明季寇氛決黃灌汴而洪流橫溢歲久不治迄於本朝在河諸臣皆未能殫心修築以致康熙十四五年間黃淮交敝海口漸淤河事幾於大壞朕乃特命靳輔為河道總督靳輔自受事以後斟酌時宜相度形勢興建堤壩廣疏引河排衆

議而不撓竭精勤以自効于是淮黃故道次第修復而漕運大通其一切經理之法具在雖嗣後河臣互有損益而規模措置不能易也至於創開中河以避黃河一百八十里遄悍之險因而漕輓安流商民利濟其有功於運道民生至遠且大朕每涖河干徧加諮訪沿淮一路軍民感頌靳輔治績者衆口如一久而不衰夫人臣有大建樹於國家者獎勵酬庸宜從優渥雖賜卹易名已循彝典尚應特予褒敘賚以殊恩靳輔著加贈太子

太保仍給世職拜他喇布勒哈番用彰朝廷追美勞臣之典為矢忠宣力者勸爾部即遵諭行特諭康熙四十六年五月二十九日

諭戶部

朕屢次視河南巡凡所過地方遇有各省漕船務加詢問因備悉其長途輸輓之事每船額載糧米數百石全責成於旗丁旗丁管領重運遠涉江河經行數千里始抵通州身家性命所關其責甚鉅及交納入倉時設有

糧數不足則處分追賠定例極嚴既有懲創處分之例
即不可無獎賞激勸之典如各營兵丁內因人材壯健
勉力報効拔補將領者甚多旗丁中有歷運四五十
年者累歲積勞奉公若不定一議敘之例則希榮無階衆
丁何所鼓勵嗣後凡有領運照數全完者應行總漕獎
賞若於額定糧數之外有多交者計算米數竝領運次
數議敘授以職銜庶各幫運丁皆踴躍自効而不肖之
徒侵蝕虧損之弊亦可以漸止此朕破格優卹旗丁裨

益漕務之至意爾部即遵旨會同兵部詳議定例以聞
康熙四十六年五月二十九日

諭兵部

國家綏輯兵民又安海嶠必資威望素重之臣以畀干
城之寄有能久鎮巖疆實彰勞績者則錫命酬庸宜加
顯秩福建水師提督吳英當王師初定八閩即親履行
陣自偏裨以至大將駁歷四十餘年比任提閩以來益
殫壯謀克修軍紀目前諸將中明習水性訓練舟師者

罕與媿倫是用特渙殊恩俾膺異數著授為威略將軍
仍管水師提督事務以示朕優眷勞臣至意爾部即遵
諭行特諭康熙四十六年五月二十九日

諭內閣

朕此番閱視河道回鑿時過臨清閘有一安慶運船觸
損所載糧米俱被水侵恐部中以其不在江河不予豁
免是乃朕所親見者著傳與戶部察明免其賠補康熙
四十六年六月初五日

諭內閣

朕每次巡幸循歷方隅雖窮鄉僻壤小民之生計鮮不周知觀東南西北地勢水土與夫飲食衣服器用悉皆不同穀桑麻綿耕種各隨土宜非人力所能移奪地方官員將小民現在力作之務若能加意勸導使不致荒廢即為實能盡心之人今責成地方官令五畝之田種桑二株百畝之田種桑四十株此四十株之桑葉養蠶幾何此桑從何處移植即令移植未必水土盡與桑木

之性相合更閱幾年便可成用此等物情言者竝未計及且山東人於蠶種初出時皆置之山間橡樹之上俟其結繭竝無用桑育蠶之事此等處言者亦未之知小民惟利是從雖以法禁之不止若無利雖百計嚴督之不行此亦理之所必然者今當昇平之日惟以無事為本乃不度地理之燥濕不計水土之順逆欲強迫百姓募南人以教之蠶斷斷乎不可行也李紹周所奏已悉下所司知之康熙四十六年六月初六日

諭內閣

李紹周又奏北地開渠事聞之似是而行之斷乎不可
民間田畝雖有高下悉皆一槩耕種雨水過多之歲則
高田有收而窪田無獲雨水不足之歲則高田無獲而
窪田有收今若無故責成有司開濬溝渠必致逼擾百
姓若動用正項錢糧又需費無窮且地方官員難周知
田土之高下勢必須人量度儻定欲壞民間現耕之田
以疏水道小民又孰肯聽其毀棄已田也耶南方田畝

陂塘雖有引水出入之路如天時雨澤失調亦難免災
侵何況北地當此無事之際不宜新勅事端以重累官
民下所司知之康熙四十六年六月初六日

諭工部

頃朕閱視河工見黃淮俱已安流運河亦較前深通重
運無阻但湖水大漲則運河東堤尤屬緊要應速興工
加修這工程交與總河詳勘動用各省督撫捐輸河工
銀兩盡心堅築工完報部察核其天然壩建閘開河等

工亦著將此項錢糧動用康熙四十六年六月初六日

諭大學士馬齊等

近日總督博濟請於甘肅開捐納朕即批以當行與否可與甘肅巡撫齊世武商酌再奏捐納一事原非善政若在甘肅地方開例至臨時又必奏甘肅路遠願捐之人不能跋涉仍請在西方等處捐納朕灼見此等情弊故特批當行與否與齊世武商酌茲特令爾等知之康熙四十六年六月十七日

諭起居注官揆敘等

今年朕於二月二十八日抵揚州彼時麥已秀矣至四月二十日回鑾則正在刈麥之時南方麥秀雖早於北方而仍與北方同熟至於穀稼果品大略皆然江南梅花正月即放至五月始實朕取至暢春園種之見其三月花放亦於五月結實花放於兩月之前而同至五月結實此皆水土之故也南方之物開花吐穉雖早而成實遲故食之則難消北方之物開花吐穉雖遲而成實

速故食之則易消皆土性冷煖自然不可強者試於塞外種稻其地高寒難以收穫種別項之穀則無如塞外豐茂者江南不及京都京都不及塞外朕以此等土性向張玉書李光地言之彼皆心服謂朕所見極是朕巡行各省所見諸物無不留心詳察故知之甚明確也康熙四十六年六月二十八日

諭大學士馬齊等

江浙被旱災事王然於六月二十八日具題邵穆布於

七月初十日具題伊等題報之後有雨無雨著問江南
浙江九卿大小諸臣或有伊等家信或問之南方來人
著即陳奏雖有錯誤亦不較也至江西湖廣兩省雨水
米穀何如亦著問明與九卿所議另具摺來奏江西湖
廣雨水調和米穀有收尚無妨礙儻雨水不調關係甚
大不可不預為籌畫也康熙四十六年七月二十八日

諭兵部

外省城守營兵因管束不嚴以致兵丁氣習甚壞參領

張倫若有貪婪事蹟自應列款糾參今因責治有過兵丁即加處分則嗣後兵丁必有妄訐該管官員之事此風甚不可長京口將軍等題參張倫不合張倫不必處分康熙四十六年九月十七日

諭大學士馬齊等

近日于準以旱荒請行捐納若開捐納之例其中僥倖者不過數人而已於貧民毫無益也此中情事朕知之甚晰今急行拯救始於地方有濟若待捐納則民皆流

散矣康熙四十六年九月十九日

諭戶部

從來漕糧關係倉儲最為重要每歲刻期輸輓繁不停徵即蠲除節年額賦亦不及漕項朕前以國家經費尚充曾有酌免漕糧之事係出特恩去年頒發諭旨已將江南省民欠地丁銀米自康熙四十三年以前通行蠲豁而漕項所欠尚在徵收今念江南地方現被旱災除新徵糧米另有諭旨酌量截留散賑外其四十三年以

前江寧巡撫所屬各府州縣未完民欠漕項銀兩六十八萬七千兩有奇米麥三十一萬一千八百石有奇著該撫一一察明悉與全免用紓閭閻之餘力俾辦額運之正供事切利民蠲逾常格爾部移文該撫令張示徧諭務使均霑實澤以稱朕深軫民依之意如有不肖有司朦混重徵者察出定從重治罪爾部即遵諭行特諭

康熙四十六年十月初七日

張倫若有貪婪事蹟自應列款糾參今因責治有過兵丁即加處分則嗣後兵丁必有妄訐該管官員之事此風甚不可長京口將軍等題參張倫不合張倫不必處分康熙四十六年九月十七日

諭大學士馬齊等

近日于準以旱荒請行捐納若開捐納之例其中僥倖者不過數人而已於貧民毫無益也此中情事朕知之甚晰今急行拯救始於地方有濟若待捐納則民皆流

散矣康熙四十六年九月十九日

諭戶部

從來漕糧關係倉儲最為重要每歲刻期輸輓繁不停徵即蠲除節年額賦亦不及漕項朕前以國家經費尚充曾有酌免漕糧之事係出特恩去年頒發諭旨已將江南省民欠地丁銀米自康熙四十三年以前通行蠲豁而漕項所欠尚在徵收今念江南地方現被旱災除新徵糧米另有諭旨酌量截留散賑外其四十三年以

前江寧巡撫所屬各府州縣未完民欠漕項銀兩六十八萬七千兩有奇米麥三十一萬一千八百石有奇著該撫一一察明悉與全免用紓閭閻之餘力俾辦額運之正供事切利民蠲逾常格爾部移文該撫令張示徧諭務使均霑實澤以稱朕深軫民依之意如有不肖有司朦混重徵者察出定從重治罪爾部即遵諭行特諭
康熙四十六年十月初七日